



大方廣如來秘密藏經

矢譯師名附二秦錄



清刻龍藏佛說法變相圖

大方廣如來秘密藏經 同上卷

染七

矢譯師名附二秦錄

如是我聞一時佛住王舍城祇闍崛山與大
比丘僧八千人俱菩薩摩訶薩三萬二千衆
所知識得陀羅尼無礙辯才得無生法忍降
伏魔怨一切法中快得自在善能種種神通
變化善知一切禪定三昧入出自在爲諸衆
生作不請友永離蓋纏善能了知諸衆生根
善知依止於了義法淨修六度到於彼岸遊
戲五道教化衆生心無厭倦無量無邊百千
萬億那由他劫久修諸行已曾供養無量諸
佛善爲諸佛之所護持護正法城不斷佛種
常以聖德悅樂一切轉妙法輪善能往來無
邊佛土奉觀諸佛大師子吼治大法船擊大
法鼓吹大法螺善集一切福德莊嚴相好嚴

身念慧堅進善知慚愧法喜自娛具足成就
大慈大悲隱蔽日月所有光明利衰毀譽稱
譏苦樂是世八法所不能污不高不下善斷
愛恚常與方便智慧相應隨衆生根善開化
之救無救者有所爲作善觀察之身口意業
無諸過患善能集於定慧莊嚴其心調柔猶
如大龍如大師子降伏外道善能進趣大丈
夫行離諸怖畏善能決斷諸衆生疑善能勸
請無量諸佛轉於法輪善住大願永離二見
常勤度脫一切衆生善知垢淨所起因緣善
修正念不起聲聞緣覺之念不捨一切智寶
之心其心清淨猶如虛空其身柔輒心無染
汚志意無壞心所至處心無染著妙音和輒
有所言說顯露易解其言清白說無染法句
常觀他德勇猛無侶志欲道場其名曰山剛

菩薩大山菩薩持山巖菩薩山積王菩薩石
山王菩薩天進菩薩信進菩薩極進菩薩喜
手菩薩寶印手菩薩寶手菩薩德手菩薩燈
手菩薩常舉手菩薩常下手菩薩常喜根菩
薩常思念菩薩常勤菩薩常觀菩薩法勇王
菩薩淨寶光明威德王菩薩摩尼光王菩薩
過諸蓋菩薩總持自在王菩薩發心轉法輪
菩薩法勇菩薩淨衆生寶勇菩薩道分味菩
薩捷辯菩薩無礙辯菩薩不動足進菩薩金
剛足進菩薩金剛志菩薩虛空藏菩薩相好
積嚴菩薩壞魔網菩薩勝志菩薩導師菩薩
喜見菩薩賢護等十六大士彌勒等賢劫菩
薩兜率陀天曼陀羅華香等而爲上首他化
自在天王等三萬二千如是天子及餘趣向
於大乘者三千大千世界之中釋梵護世欲

界色界淨居諸天一切來集恭敬供養禮拜
如來爾時世尊爲於無量百千大衆恭敬圍
繞而演說法是時東方去此佛土七十二億
刹彼有佛土名曰常出大法之音其國有佛
號曰寶杖如來應供正遍覺今者現在而是
常出大法音國一切江河池泉諸水一切樹
林一切衆華一切諸葉一切華果一切臺觀
常出法寶無上法音彼土衆生常聞如是勝
妙法音是寶杖佛常出大法音國有菩薩名
無量志莊嚴王是菩薩觀寶杖佛已猶如壯
士屈伸臂頃沒是常出大法音國三一念之頃
而來至此娑婆世界時無量志莊嚴王菩薩
化作八萬四千寶臺妙寶所成四方四柱縱
廣正等莊嚴極妙一一寶臺化作八萬四千
寶樹華果茂盛一一樹下皆悉化作寶師子

座衆寶廁填皆悉敷置百千妙衣是諸座上
皆見佛坐形色相貌如釋迦牟尼是無量志
莊嚴王菩薩現是化已於虛空中化作寶蓋
縱廣正等百千由旬垂懸繒綵鈴網裝飾風
吹鈴網出柔和微妙可愛輦音其音遍告三
千大千佛之世界時此三千大千世界平坦
如掌生寶蓮華供養如來時無量志莊嚴王
菩薩以八萬四千寶臺而自圍遶來詣佛所
是時大衆見是化已得未曾有而作是言如
今所見此大士來莊嚴事相必說大法及此
三千大千世界諸莊嚴事又上空中垂懸寶
蓋於如來上一切天宮悉皆隱蔽是時大德
摩訶迦葉承佛神力從座而起整衣服偏袒
右肩右膝著地向佛合掌而說偈言
無垢淨光從空出 隱蔽釋梵諸光明

及蔽日月珠火光 惟願人尊說此相
 此空中現妙寶蓋 遍覆百千由旬地
 幢幡鈴網以莊嚴 世尊今將雨法雨
 鈴網所出妙聲音 其音遍告此佛界
 有聞音者煩惱息 爲何利益說此事
 三千世界平如掌 百千蓮華從地出
 華香適意悅身心 是何威德之所爲
 東方遍放金色光 八萬四千妙寶臺
 臺內寶樹師子座 見如導師釋師子
 導師此是何利事 見此事者何增益
 此是何種欲佛智 衆七 現此無量諸神變
 爾時佛告摩訶迦葉東方去七十二億佛土
 有國名常出大法音彼中有佛號曰寶杖今
 者現在彼有菩薩名無量志莊嚴王來至此
 土見我禮拜諮受聽法爲諸菩薩生大法欲

生大法力集大法智欲顯常出大法音國所
 有功德及寶杖佛所有功德以此緣故是無
 量志莊嚴王菩薩而來至此娑婆世界一日
 一夜所利衆生多於汝等滿此三千大千世
 界諸大聲聞法利衆生假令汝等數如稻麻
 竹葦甘蔗叢林壽命一劫所利衆生猶尚不
 等大德迦葉白言世尊閻浮提人若得聞是
 善丈夫名尚得大利況有信心復聞說法時
 無量志莊嚴王菩薩及諸寶臺住如來前頂
 禮佛足當禮佛時令是三千大千世界六種
 震動百千妓樂不鼓自鳴一切大衆禮如來
 足爾時無量志莊嚴王菩薩遶佛三匝及與
 八萬四千寶臺亦遶三匝遶三匝已向佛合
 掌以偈讚佛

善能柔輒微妙語

無錯無雜淨無垢

衆七

五

善名威德慧中勝	我今稽首最勝仙
多百千億功德滿	施安隱樂無諸苦
仁大悲喜等三界	而演說法除塵垢
十方諸佛歎仁德	善逝惡時得菩提
度惡衆生無疲倦	度一衆生尚爲難
一切諸佛悉平等	智慧通等號人尊
成佛無等白淨法	示現卑劣調衆生
尊若悉示佛境界	一切衆生心迷亂
大悲爲利是等故	隨彼所行演說法
人尊智勝衆所樂	常先和顏柔軟語
算數人天德無等	是故歡喜頂禮尊
一切智等諸衆生	盡諸法際降外道
一切智見伏魔怨	稽首十方降諸力
常樂真實誠諦語	善知如說如所行
苦樂不動如山王	我今稽首施世樂

爾時無量志莊嚴王菩薩偈讚佛已而白佛
 言世尊寶杖如來問訊世尊少病少惱起居
 輕利安樂行不世尊我今欲少請問如來應
 供正遍覺若佛聽者乃敢諮啓佛告無量志
 莊嚴王菩薩善男子如來當聽隨所有疑恣
 汝所問吾當隨汝所問演說悅可汝心如是
 世尊願樂欲聞時無量志莊嚴王菩薩白言
 世尊我從先佛如來應供正遍覺聞有法名
 如來祕密藏若有菩薩住是祕藏得無盡法
 得無盡辯見佛無盡善能獲得無盡神通爲
 諸衆生作實依止善哉世尊願爲演說如來
 密藏法爾時佛告無量志莊嚴王菩薩善哉
 善哉善男子乃能問佛如是之法善男子汝
 已曾於恒河沙佛所植諸善根諮受請問善
 男子汝今諦聽善思念之吾當少說如來密

染七

六

藏法無量志莊嚴王菩薩即白佛言如是世
尊受教而聽佛言善男子如來密藏法謂一
切智心發是心已堅固守護不退不捨無有
燒亂善好憶念熾然勸導顯示教誨善根先
首喜樂守護常恒堅造應作之業為是布施
為是持戒為是忍辱為是精進為是禪定為
是方便是心為杜不怯不弱不羸不壞無有
懶惰不背不捨順向是心而覺了之善業為
首質直無曲正住端直無幻無偽作已無疑
未作者作如所應作勤修行之捨不正行勤
修正行善男子是名如來秘密藏法所入法
門所謂堅固一切智心好堅守護不棄捨之
善男子何等一切智心堅固善男子一切智
心堅固有四何等四不念餘乘不禮餘天不
發餘心志意無轉是為四而說頌曰

不生念餘乘 禮佛不禮天 不生餘欲心
不禮外凡夫 修行是法時 一切智心堅
非魔及外道 得便如毛髮
善男子復有四法護一切智心何等四不為
色醉及財封醉非眷屬醉及自在醉是為四
而說頌曰

第七

七

非色財封醉 眷屬及自在 觀諸有為法
皆悉是無常 不放逸離慢 守護菩提心
斯行法功德 趣菩提不退
善男子復有四法不退菩提心何等四集諸
波羅蜜親近實菩薩修大悲心以四攝法攝
諸眾生是為四而說頌曰
常修六度無滿足 生聞聞已心柔軟
生於大欲離惡友 親近善友隨所欲
常修勝道近向者 常修悲心住四攝

常好堅住菩提心 佛功德聚不難得

善男子菩薩具足四法不捨一切智心何等

四信佛功德修集佛智見佛神通不斷佛種

是名為四而說頌曰

信解佛德已 勤修集佛智 見佛神通已

勤守護佛種 修行如是法 不捨菩提心

隨所見諸佛 倍生精進力

善男子菩薩具足四法終不燒亂菩提之心

何等四給侍諸佛面前從於如來聞法常歎

佛德依止寂靜緣念於佛是為四而說頌曰

給侍於如來 好尊重恭敬 若有所聞法

聞已如說行 常讚歎如來 信敬愛樂之

面聞勝法已 智者依於義 常讚歎功德

調御世所有 彼常勤依止 正念於諸佛

數數讚佛德 常勤觀已行 常樂獨靜處

思念於如來 善攝如是法 修行心不亂

斯人有三昧 不忘菩提心

善男子菩薩具足四法憶菩提心何等四我

要當為一切眾生良厚福田我當說道我當

隨趣如來所趣我當實知諸眾生行是為四

而說偈曰

第七

我當為世勝福田 趣邪道者示正路

善逝所趣我當趣 我當常知眾修行

菩薩大士念此德 常念菩提勝道心

彼當速疾成法王 得神通智世無等

善男子菩薩具足四法念一切智心何等四

專志念意是諸法本當念法本發一切智心

是世寶塔當念寶塔是為四而說頌曰

當專志念意 極好專念意 此是諸法本

一切世間塔 常念菩提心 住意好善住

此是十力本 當為天世塔

善男子菩薩具足四法然一切智心何等四
勢力通集不失本行滿五根力身心精進而
無有我勤行精進為利益他是為四而說頌
曰

所演說四法 熾然菩提心 若熾然智慧

得止息煩惱 慧力及通達 如是勤精進

安住服是已 莊嚴無懈怠 斯不失本誓

善安住根力 身心無疲倦 勤進求實身

住如是熾然 增長菩提心 彼智慧如是

猶日月增長

卷七

九

善男子菩薩有四法勸菩提心何等四在大
眾中稱揚讚歎菩提之心令其開解菩提之
心善受教誨隨順師長發清淨心一切煩惱
不得自在是為四而說頌曰

勸導唱道心 先住此為本 當有一切智

是名知因者 是一切智心 清淨常照明

常住於是中 世間所頂禮 常出柔軟語

速疾受教誨 諮問諸師長 一切智勝心

本性常清淨 守護菩提心 白淨離煩惱

最勝不相違

善男子菩薩有四法顯示菩提心何等四此
是我住處住是處已開示顯說知於是心有
無量德亦為他說如是之事是為四而說頌
曰

善住於所住 菩薩住是已 稱揚如是法

菩提之妙心 道心德無量 發及稱揚等

稱揚已便行 稱揚者所得

善男子菩薩有四法教修菩提心何等四謂
不羸獷言說柔軟無有羸澀顏色和悅是為

四而說偈言

柔輒解說義 常無有麤穢 和顏住是法

彼教菩提心

善男子菩薩有四法菩提之心善根為首何

等四成滿相好開門大施修淨佛土行種種

施淨於智慧常伏憍慢滿足智慧修集多聞

是名為四而說頌曰

常開門大施 彼到相好岸 善好種種施

斯當有淨土 常無有憍慢 恒求集佛智

集聞無滿足 斯有利智慧 如是勝妙相

方便起道根 六七 是巧心所轉 集先諸功德

善男子菩薩有四法常喜樂何等四喜樂見

佛見餘菩薩勝精進者生於喜樂作如是言

我當何時滿足受記受於無上菩提道記我

當何時諸衆生前作諸佛事於佛智慧生喜

樂心是為四而說頌曰

我當何時現見佛 彼生喜樂欲見佛

見餘菩薩勝進者 生喜欲修是精進

我當何時滿德聚 得受勝記證菩提

勝智某方作法王 菩薩常生是喜欲

我何時世作佛事 得神通智到彼岸

名聞普遍十方供 菩薩常生此喜欲

善男子菩薩有四法不喜何等四不喜稱譽

不實功德得諸利養不喜得諸釋梵護世人

天富樂不喜一切聲聞緣覺不喜一切外道

所得勝供養事是為四法不喜而說頌曰

不喜名稱大利養 於身命財亦如是

不喜釋梵及護世 是諸邪有悉無常

不喜聲聞及緣覺 唯除趣向勝乘心

不喜世禪及外道 不喜身見及邊見

六七

十一

善男子菩薩有四法護一切智心何等四如
說如住如作而說於諸衆生其心平等生極
欲心護於善法是爲四而說頌曰

如說如住如作說 等心衆生極欲道
善住於是四勝法 常護道心不忘失

善男子菩薩有四法是所應作何等四修集
多聞思念多聞說於所聞不退寂靜是爲四
而說頌曰

斯常勤集於未聞 是常修念思多聞
是常勤說於多聞 是常勤修爲得禪

善男子菩薩有二法定一切智心而行布施
何等二專意念定捨不望果報是爲二而說
頌曰

以歡喜心而施與 施已生喜不望報
一切悉捨向菩提 定心施已證菩提

善男子菩薩有二法一切智爲首修持淨戒
何等二於諸衆生無侵害心毀戒者所生大
悲心是爲二而說頌曰

不生毀害心 等施上中下 倍增生悲心
於惡逆衆生

善男子菩薩有二法一切智爲首修行忍辱
何等二自捨已樂施與他樂是爲二而說頌
曰

不求於自樂 常爲利樂他 斯有如是忍
佛菩提爲首

善男子菩薩有二法一切智爲首修行精進
何等二菩提心爲首不捨諸衆生是爲二而
說頌曰

行一切白淨 上道心爲首 不見我衆生
精進無毀滅

梁七

十二

善男子菩薩成就二法一切智為首修行禪定何等二方便入禪本願力出是為二而說頌曰

勇健者常起 智者行禪定 降伏諸結使 恒常欲得禪 本願力持出 當為世導師

斯有如是德 獲得於禪定

善男子菩薩成就二法一切智為首有於智慧何等二自離諸見為斷一切眾生見故修行智慧是為二而說頌曰

彼離於諸見 修利為眾生 有勝智現前 智安隱行道

善男子菩薩成就四法有於方便何等四慈愍眾生而為作救大悲真實無有疲倦喜樂於法生歡喜故捨離煩惱無有怯弱是為四而說頌曰

修慈無瞋恚 起悲無疲倦 以法生歡喜 捨煩惱無難

善男子菩薩有四法無厭何等四多聞無厭集德無滿阿練兒處無滿回向無滿足是為四而說頌曰

求聞無滿集福爾 阿練兒處無滿足 福德回向無滿足 菩薩如是四無厭

善男子菩薩有四法無足何等四是菩薩念過去佛作如是念是諸佛等皆悉修集最勝菩提我今云何而不修集念未來佛我亦入在是等數中念現在佛念是佛時而作是念此諸佛等現悉了知一切諸法是諸念中無有怯弱是為四而說頌曰

憶念過去佛 無怯心增長 彼佛得勝道 我云何不得 念未來善逝 我在是數中

我云何不得 念未來善逝 我在是數中

無怯倍精進 我定在是數 念現在導師
 本行菩薩時 我當除諸結 證寂滅菩提
 解了一切法 所住如所欲 終不生怯心
 倍生好勝進
 善男子菩薩有四法不退大乘何等四其心
 如地其心如水其心如火其心如風是爲四
 而說頌曰
 其心如地水 心亦如風火 作不作同等
 不得道不退
 善男子菩薩有四法解知無我何等四而是
 菩薩作如是念諸眾生界我當悉知是等心
 行諸眾生界我當悉知是等諸根而爲說法
 諸眾生界我當除斷一切煩惱而爲說法無
 量佛智我等覺了實非我身能覺此法亦非
 我心我諸善根能覺此法無有我者名爲善

薩是爲四而說頌曰
 眾生界諸心 所行叵思議 煩惱妄分別
 妄想生是非 佛智亦如是 無量叵思議
 非我之所能 解了於佛智 諸結使相違
 無色不可見 我應悉除斷 顯示解脫道
 善男子菩薩有四法無有怯弱何等四願諸
 善根修方便慧修信進念力信無上道是爲
 四而說頌曰
 善喜悅克潤 慧方便衆香 信精進念力
 斯有解脫道 如是四慧法 持法無有厭
 爲厭倦者依 亦爲世作救

大方廣如來秘密藏經卷上

大方廣如來祕密藏經卷下

染七

失譯師名附二秦錄

善男子菩薩有四障法應當覺知何等四毀
謗正法祕悋惜法懷增上慢修無色定是為
四而說頌曰

菩提心有四 說是名障礙 菩薩應覺知

應數數遠離 毀謗於正法 多聞懷悋惜

增上慢貢高 不善起禪定 是故護正法

聞已廣流布 捨慢無貢高 遠離不禪定

善男子菩薩有四法所造速疾何等四所作

以智不以憍慢染七所有善根回向菩提不趣下

乘一切諸趣不生染著若生染著一向專為

化於眾生晝夜三時常修三分滅過惡業未

來不造是為四而說頌曰

所造以智不以慢 回善上道非下乘

慧者不信於諸有 發心為利諸眾生

晝日三時夜亦爾 三分悔過滅先惡

不造眾惡集諸惡 慧者如是集善業

善男子菩薩有四法極好何等四不自稱譽

不輕於他遠離諸惡捨除諸慢是為四而說

頌曰

不自稱譽不輕他 所造諸惡悔不作

不生憍慢及慢慢 其心端直修善行

善男子菩薩有二法端直速疾何等二若有

所問如實而答先所見事無所覆藏是為二

而說頌曰

如問而演說 不藏先所見 寧捨於身命

終不說妄語 正直於是法 是為賢善根

彼得於質直 疾覺勝菩提

善男子菩薩有二法無有諂偽何等二雖多

獲利不欲歎德不得利養不自稱譽是爲二而說頌曰

雖多獲利養 不歎示已德 大智所不欲
是不諂者得 設不得利養 此是我本業
不欲他有過 勿令彼業熟

善男子菩薩有二法不望他報何等二我應當利一切衆生非諸衆生而利於我我當覺知而爲菩提是爲二而說頌曰

我應利衆生 我荷擔彼等 我求無爲道
不觀望他報 我不求有爲 我求無爲道
我攝護世間 不望報得道

善男子菩薩有二法作於不作何等二不知恩者而常供給於知恩者作於重任是爲二而說頌曰
不知恩衆生 於彼不望報 諸陰界入等

皆爲作菩提

善男子菩薩有二法是所應處何等二常值諸佛亦常值遇菩薩乘者是爲二而說頌曰
二種所應處 是處增名稱 得值諸如來
菩薩所識知

善男子菩薩有二所不應修何等二不與願行聲聞乘者而共同止不驚畏諸有獨處宴默是爲二而說頌曰

不與修行者 而共同止住 不驚畏諸趣
依止宴寂處

善男子是名初入如來密藏根本句也菩薩若入是初根本句是菩薩能成就如來秘密藏法世尊說入如來密藏初句法時六萬衆生及天與人發於無上正真道心十千菩薩得無生法忍五百比丘不受諸法求盡諸漏

心得解脫時此三千大千世界六種震動大
 光普照人天妓樂不鼓自鳴人天阿脩羅等
 同聲三唱作如是言其有衆生得聞於是如
 來密藏法快得善利若有書寫受持讀誦如
 說修行是等衆生皆當不失如是如來祕密
 藏法爾時無量志莊嚴王菩薩聞是如來密
 藏法已即作是念我今當以何等供具供養
 如來應供正遍覺復作是念外物易捨內事
 難捨我今當以自身奉供如來世尊即昇虛
 空而說偈言

我今奉徧覺 以自身供養 以此無上捨
 願令如導師 財供二足尊 此事不爲難
 云何爲希有 所謂身供養 我今供無等
 自身奉遍眼 爲世人天供 如大智師子
 爾時無量志莊嚴王菩薩即便放身投如來

上當于爾時以佛神力未曾有華異華異色
 甚爲鮮淨極妙端嚴散如來上是菩薩身又
 不墜地亦不現空此諸華等至佛身上即復
 還湧住虛空中成大華蓋覆四天下是華蓋
 中垂懸華貫出大光明是光明中現妙蓮華
 是蓮華上有菩薩坐如無量志莊嚴王是菩
 薩等從華臺起頂禮佛足同聲請言唯願世
 尊說如來祕密藏法無令斷絕及護如來密
 藏眷屬爾時大德摩訶迦葉生希有心歎未
 曾有白言世尊是無量志莊嚴王菩薩以身
 莊嚴供養如來以身供養於如來已現是菩
 薩諸莊嚴事世尊願令一切諸衆生等得於
 如是莊嚴之身願使如來常壽住世世尊我
 等今者快得大利乃得見是善大丈夫聞其
 說法爾時佛告摩訶迦葉汝今見是無量志

卷七

十八

莊嚴王菩薩不已見世尊迦葉是善男子於
恒河沙等佛所恒得諮請如是如來祕密藏
法賢劫諸佛所亦當請問如是如來祕密藏
法爾時大德摩訶迦葉復白佛言善哉世尊
惟願敷演說是如來祕密藏法如此菩薩所
啓請者爾時世尊告大迦葉汝今善聽如來
密藏少許法分何以故若於一劫演說此法
不可窮盡迦葉白言如是世尊爾時迦葉及
諸大衆受教而聽佛言迦葉於意云何汝謂
我行菩薩道時所捨手足頭目耳鼻皮肉骨
髓血及妻子略說乃至一切財物處處逼惱
於菩薩者是諸衆生不墮地獄畜生餓鬼及
諸惡趣何以故本菩薩時志意淨故及大誓
願淨戒聚故於諸衆生大悲純至及堅忍故
以大慈故大功德法故牢強精進定向大乘

故自心淨故大願豐饒故不喜自樂故其有
衆生觸燒菩薩毀罵之者菩薩德故不墮惡
道迦葉我今引喻以明斯義迦葉猶如病人
良醫授藥而是病人毀罵是藥及與良醫先
毀罵已後乃服藥迦葉汝意云何藥以罵故
不爲藥耶病不除耶不也世尊藥七雖復毀罵不
失藥勢而能除病如是迦葉菩薩如彼藥及
良醫雖不恭敬種種觸惱然是菩薩純淨志
意無有缺減迦葉如大寶珠衆德所成其性
純淨除諸瑕穢若有人天毀罵是寶而不恭
敬迦葉於意云何是大寶珠畏毀罵故失寶
力耶不也世尊佛言迦葉是淨寶珠猶彼菩
薩志意清淨一切衆生雖不恭敬所有功德
無有折減迦葉如大油燈假令人天而毀罵
之以毀罵故便闍冥耶不也世尊佛言迦葉

菩薩志意純淨如是雖復觸惱不失其性迦
葉以是事故當知衆生雖有觸燒於菩薩者
不墮惡道何以故由是菩薩本願淨故所願
皆成爾時大德摩訶迦葉白言世尊如我解
佛所說義趣若於如來起不善業是衆生等
亦復不畏墮於惡道佛言如是迦葉若有衆
生於大悲如來生信敬心解入進趣若佛現
在若滅度後若有奉施如來及塔若幢幡蓋
華鬘塗香及與末香若寶若衣及諸飲食隨
於種種所有諸物若取若食若自取若教取
迦葉我說是人無有所犯迦葉貧爲最苦不
恭敬故作劫奪故無畏懼故不信敬故不解
業故不慮報故以貪求故難調伏故貪瞋癡
故無慚愧故兇橫惡故不思如來有大慈悲
不信如來多利衆生取如來塔物乃至一縷

若自取若使人取我說是人不名少犯我不
說彼不墮惡道迦葉若有衆生於如來物及
佛塔物若自取若教人取如來今者悉知是
人悉見是人當墮惡趣又以此緣當得斷結
何以故是人心行爲佛護故迦葉若於如來
若如來塔生心緣念乃至起於少許悔心迦
葉是衆生心自當改悔以緣如來生悔心故
背棄生死一劫之罪結使微緩迦葉假有人
天墜墮于地墮大地已還依大地而得起住
如是迦葉是衆生等於如來所生不善故墮
在惡道墮惡道已還緣如來速得出離云何
名爲緣於如來於如來所生慳重心爾時大
德迦葉白言世尊是人以是惡賊之心若能
生心緣念如來尚得大利況淨心者佛言迦
葉如汝所言若有衆生起念如來思憶如來

觀緣如來是等一切悉皆當得涅槃果證大德迦葉白言世尊如我解知佛所說義寧於如來起不善業非於外道邪見者所施作供養何以故若如來所起不善業當有悔心究竟必得至於涅槃隨外道見當墮地獄餓鬼畜生佛言迦葉如汝所言迦葉設有人天罵赤梅檀以手椎打速撩棄地迦葉於意云何如是人者有何等香迦葉白言而是人者有梅檀香如是迦葉若有衆生眼見耳聞及口宣說於如來者當知是人五有解脫香迦葉有人執於抱糞污已六七以諸妓樂一切衆華而供養之如是人者有何等香迦葉白言世尊是人唯有糞穢臭惡如是迦葉其有親近恭敬供養諸外道者當知是人亦復如是有諸見畏地獄畜生餓鬼等畏迦葉若善男子善女

人信於如來有大慈悲慙重敬信除慢不憍無有貪瞋及與愚癡意志決定解知業報質直無諂無有幻偽於如來所得淨信心諸根無貪無有諂曲志意不壞淨信成就信佛大悲多利衆生信佛本行信於如來不捨一切諸衆生等有如是心有如是意設乏於食病藥所須未得道果未入正位若得所須能得道果入於正位若其不得饑渴羸劣不能修善不得道果是人若取如來佛物衣服食飲病藥所須自服食之迦葉我不說是有惡道果迦葉是名如來祕藏法應當密持善好守護不應在彼見著者前開示演說勿令是人重增所見迦葉云何爲解謂解如來說一切法云何爲縛迦葉所言縛者所謂貪著云何爲解謂不貪著不分別二迦葉我今不說

是無著者名之爲犯何以故迦葉羸劣煩惱
從虛妄生迦葉若其不實不以生故名之爲
實迦葉我今引喻爲示不實妄想事故迦葉
猶如人天持芥子火吹令增長漸燒諸物成
大火聚如是迦葉愚小凡夫起少不正思惟
想念堅著諸見隨所妄想隨是諸處增長結
使迦葉若有火聚如須彌山無有所依迦葉
於意云何如是火者爲當增長爲當漸滅迦
葉自言是火當滅更不增長佛言迦葉不實
妄想諸煩惱等若更不起若更不著更不妄
想更不喜樂更不分別此當漸滅而不增長
迦葉以是事故應當解知羸劣不實妄想煩
惱是不真實迦葉猶如有人至毒家舍竟不
服毒自生驚怖受大苦痛發聲大呼我今遇
毒我今遇毒有義良醫持不實藥令是病人

除不實病得離衆苦迦葉於意云何若是良
醫持於實藥與是人者是人活不不也世尊
是人實不服食於毒自生毒想須不實藥以
療治之佛言如是迦葉諸小凡夫爲於不實
煩惱所惱是故如來說不實法爾時迦葉白
言世尊如來說法不真實耶佛言迦葉汝所
解說爲是真實爲不真實迦葉自言我所解
說無有真實何以故世尊所有貪欲以不淨
對瞋恚慈對癡因緣對世尊若不淨是實則
不能除不實貪欲亦非貪欲生不淨觀若慈
是實即不能除不實瞋恚亦非瞋恚生於慈
觀若愚癡是實起愚癡已非因緣對亦非因
緣能除愚癡是故世尊一切結使及斷結法
二俱不實無物無定無有成就是故不實諸
煩惱等習近不實便得除去世尊結使無去

何以故若有除去則爲有去若已有去則便有來是故世尊一切結使無去無來是故知諸一切有爲無來無去名離煩惱佛言迦葉此如來密藏說一切法本性清淨爾時大德摩訶迦葉白言世尊是十惡道如佛所說其性無垢本性淨耶佛言如是如是迦葉何以故無有自在而犯於殺無可親信而犯於盜非無主無護而犯邪姪非爲護他而犯妄語非爲調伏而犯惡口非爲破壞外道邪增而犯兩舌無隨應器而犯綺語無羸惡教而犯瞋恚無有希望增上善根名之貪無有將護自在者意少不正言而犯邪見迦葉是十惡道若不堅著我不說彼名之有過迦葉是十惡道若不堅著名爲不犯如是迦葉一切煩惱若不堅著我說無犯迦葉諸不著者名曰

離見迦葉白言世尊十惡業道何者最重佛言迦葉是十惡業道殺及邪見名爲最重迦葉隨在在處諸惡不善若不堅住若不堅執若不堅著一切我說名爲不犯迦葉若少不善若其堅住堅執堅著一切我說名之爲犯迦葉五無間罪若不堅住堅執堅著生於見者我不說彼名曰爲犯況復餘小不善業道迦葉我不以不善法而得菩提亦不以善法而得菩提迦葉若以不善得於菩提諸小凡夫亦得菩提若以善法得菩提者一切被燒草木叢林應還生長迦葉我今問汝如來云何得於菩提迦葉白言佛是法本世尊是眼世尊是依如世尊說當共奉行佛言迦葉解知煩惱從因緣生名得菩提迦葉云何爲解知從因緣所生煩惱解知是無自性起法是

卷七

十四

無生法如是解知名得菩提迦葉但假名字
名得菩提而是菩提不以文字言說而得若
無文字無言無說無得菩提是第一義迦葉
如汝所問十惡業道何者為重迦葉如人有
父得緣覺道子斷父命名殺中重奪三寶物
名盜中重若復有人其母出家得羅漢道共
為不淨是姪中重若以不實謗毀如來是妄
語中重若兩舌語壞賢聖僧是兩舌中重若
罵聖人是惡口中重言說壞亂求法之人是
綺語中重若五逆初業是瞋恚中重若欲劫
奪持淨戒人物是貪中重邪見中重謂之邊
見迦葉此十惡道是為最重迦葉如來知是
十惡業是為最重迦葉若有一人具是十惡
迦葉是惡眾生者解知如來說因緣法是中
無有眾生壽命無人無丈夫無我無年少無

作業者無受者起者無知者見者無福伽羅
無生無滅無行是為盡法無染無著無善不
善本性清淨一切諸法本性常淨解知信入
迦葉我不說彼趣向惡道無惡道果何以故
迦葉法無積聚法無集無惱迦葉一切諸法
生滅不住因緣和合而得生起起已還滅迦
葉若心生滅一切結使亦生已滅若如是解
無犯犯處迦葉若犯有住無有是處迦葉如
百千歲極大閻室不然燈明是極閻室無門
牕牖乃至無有如針鼻孔日月珠火所有光
明無能得入迦葉若閻室中然火燈明是閻
頗能作如是說我百千歲住今不應去迦葉
白言不也世尊當然燈時是閻已去佛言如
是迦葉百千萬劫所造業障信如來語解知
緣法修觀察行修於定慧觀無我無命無人

無丈夫等我說是人名為無犯無處無集迦
葉以是事故當知羸劣諸煩惱等智慧燈照
勢不能住迦葉是說如來密藏住處無上大
師子吼轉淨法輪天人魔梵所不能轉迦葉
若有衆生信是如來祕密藏法如是受持如
是觀察彼當如是大師子吼是時大德阿難
白言世尊是無量志莊嚴王菩薩自以其身
供養如來當以何身覺菩提道時華臺中諸
菩薩等問阿難言於意云何可以身覺於菩
提耶阿難多作斯觀當以身心覺於菩提阿
難報言諸善丈夫若非身心覺於菩提當用
何等而覺菩提諸菩薩言大德阿難身之實
性是菩提實性菩提實性是心實性心之實
性即是一切法之實性覺是一切諸實性故
名覺菩提時諸華臺所有菩薩頂禮佛足說

如是言世尊我等若至此大地時是無量志
莊嚴王菩薩乃當得成阿耨多羅三藐三菩
提是時阿難白言世尊是諸華臺衆菩薩等
幾時當至於此大地佛告阿難是諸菩薩於
下方界分恒河沙等諸佛如來所諮受請問
於是如來佛七祕密藏法聞已解義阿難白言世
尊是無量志莊嚴王菩薩幾時當成阿耨多
羅三藐三菩提佛告阿難是賢劫中千佛已
出當出阿難最後如來號名盧志阿難盧志
如來應正遍覺諸聲聞衆多先諸佛所有聲
聞僧阿難是盧志如來乃當授是無量志莊
嚴王菩薩無上道記云無量志莊嚴王菩薩
過九十八劫當得成佛號莊嚴王亦於是界
得無上道是莊嚴王如來坐此地時是華臺
中諸菩薩等爾乃至地復當聞此如來密藏

法阿難爾時是莊嚴王如來世界名作無量功德莊嚴阿難一切欲界諸天宮殿等彼莊嚴王佛國中一寶臺耳是娑婆界爾時當名妙好色土阿難莊嚴王如來壽命百劫佛滅度後正法住世滿足十劫純菩薩僧說是莊嚴王如來記已佛上華蓋便沒不現無量志莊嚴王菩薩現佛前住是時阿難自言世尊護持此法令得久住於閻浮提增廣流布令善丈夫能持如來密藏法者成滿功德手得是法爾時世尊告阿難言假令四大變易其性終不令是善丈夫等不聞是法而取命柒七終阿難若有書寫受持讀誦當知是人即是如來所持阿難若有人能右手執持恆沙佛界滿中七寶右手復持恆沙世界滿中七寶若晝三時夜三時持用布施是人不懈經恒

沙劫阿難是布施德若有書寫受持讀誦是經典者所得功德復過於是是故阿難汝今受持讀誦是經令諸法器普得聞知是諸人等則為受持如來秘密藏法佛說此經已無量志莊嚴王菩薩大德阿難大德迦葉一切大衆天人阿脩羅等聞佛所說皆大歡喜

大方廣如來秘密藏經卷下

音釋

媯而沼切 穢擾亂也 穢古猛切 穢惡也 懽虛里切 叵不可也 縱私箭切 椎直追切 撩朗鳥切